

GESNEUWELDE MAKKERS GEDENK

Oudstryders byeen

Rooiplaas sosiale tuiste vir 'parabats'

Dirk Kok

'n Tiental oudvalskerm-soldate van oor die land heen en veterane van ander weermag-eenhede het die naweek in Bloemfontein saamgetrek om reünie te hou en makkers te gedenk wat gesneewel het.

Die reünie Saterdagmiddag by die valskermveterane se Rooiplaas-bymekaarkomplek in Bainsvlei het met 'n parade en kransleggings begin.

Daarna het valskerm-spronge gevolg deur lede van die Bloemfontein-valskermklub en kol. Japie Keet, 'n Bloemfonteinse valskerm-soldaat met 7 000 spronge agter sy naam.

Keet doen deesdae diens in die hoofkantoor van die weermag se valskermformasie in Pretoria.

Die fokus op die reünie het geval op die drie helikopter-bemanningslede en 12 valskerm-troep van 1 Valskerm-bataljon in Bloemfontein wat op 9 Augustus 1982 in Operasie Meebos dood is toe hul Puma-helikopter suidsoos van Cuvelai in die suide van Angola neergeskiet is.

Verskeie veterane van 61 Gemeganiseerde Bataljon in Bloemfontein wat deur die jare saam met valskerm-soldate in verskeie militêre operasies geveg het, het ook die reünie bygewoon.

Genl.maj. Roland de Vries, wat in 1999 as adjunkhoof van die weermag uitgetree en in Operasie Meebos bevelvoerder van die gevegsgroep van 61 Gemeganiseerde Bataljon was, het in 'n oorsig oor Operasie Meebos hulde gebring aan die 15 gesneewelde soldate.

"Dit is vasgebrand in my onderbewussyn. Ek kan nie daardie hartseer beskryf nie... om dit te sien. Dit was 'n baie hartseer dag vir ons daar. Daar was stilswye in die laer. Die skok was vir ons en die troepe groot."

Twee minute van stilte is



Oudvalskerm-soldate op parade op die reünie in Bloemfontein.

Foto's: DIRK KOK



Kranse is op die reünie van oudvalskerm-soldate gelei vir gesneewelde makkers. Van links is Nols Schoeman, oudvalskerm-soldaat van Riebeeckstad in die Goudveld, die afgetrede genl.maj. Roland de Vries, en Nico Beneke, Bloemfonteinse sakeman, oudvalskerm-soldaat en 'n stigter van die Rooiplaas-veteranegroep. Schoeman is op die reünie vereer vir 'n verbintenis van meer as 'n halfeeu met die valskermkorps. Hy het in 1968 in Bloemfontein Ingekliaar as 'n diensplig-valskerm-soldaat.



Kol. Japie Keet, steeds 'n valskerm-soldaat, was een van die valskerm-sprongers op die reünie.



Kol. Japie Keet in die lug bo die Rooiplaas-bymekaarkomplek vir oudvalskerm-soldate.

deur die oudstryders gehandhaaf vir die 15 gesneeweldes nadat hul name uitgeroep is deur Nico Beneke, oudvalskerm-soldaat, Bloemfonteinse sakeman en een van die stigters van Rooiplaas by Bainsvlei.

Die helikopterbemanning was kapt. John Twaddle (25), vlieënier en helikopterbevelvoerder, lt. Chris Pietersen (22), medevlieënier, en vlug-sers. Grobbies Grobbelaar (31), vluginjener. Die valskerm-soldate wat dood is, is kpl. Esuas Lom-

bard (19), o.kpl. Stephen Hoare (19) en skutters Russell Hilton-Barrett (20), Alan de Klerk (19), Anton Kruger (21), Grant Krull (20), Martin le Roux (21), Shane Patrick Mallon (20), James Thomas Marshall (19), Craig Andrew Moody (20), Andries Hermias van Niekerk (19) en André Wolmarans (20).

Die Rooiplaas-bymekaarkomplek vir oudvalskerm-soldate en Rooiplaas-veteranegroep vir oudvalskerm-soldate is deur Beneke en 'n destydse regiment-

sersant-majoor van 1 Valskerm-bataljon, wyle Johan Landman, begin.

Die Rooiplaas-naam verwys terug ná die bynaam vir die 1 Valskerm-bataljon-eenheid in Tempe.

Beneke sê Rooiplaas is begin sodat oudvalskerm-soldate kan sosialiseer en ook na mekaar kan omsien. Dié oudstrydersvereniging, wat selfs in Amerika lede het, beywer hom ook vir bystand aan oudmakkers wat in die oorlog vermink is en

aan oudmakkers wat in nood is of behoeftig is, sê Beneke.

"Dit is 'n sosiale tuiste vir oudsoldate, maar ook 'n uitlaatklep en 'n plek van veiligheid. Baie manne sit met posttraumatische stresversteuring."

Soldate van ander eenhede kan assessorlede van Rooiplaas word en vriende en ondersteuners kan ook aansluit.

Rooiplaas se aktiwiteite is te sien op die webblad rooiplaas.co.za.